



~~C 8288~~

Ud 5360

Biblioteka Jagiellońska



stdr0007433

- 1
- 2, Epitaphia Cphi. Merzini a Kurozowski.
- 3, Dreover, Christoph. Radziwil.
- 4, Burfius, Oratio funebris.
- 5, Tarobellus, Feralis pompa in funere A. Corvini.
- 6, Kramek, Andr. Lipedipoksi.
- 7, Tarobellus, idem q. no. 5.
- 8, Ch. de Chales Chalucky.
- 9, Comenius, Spiegel Guttern Obigkeit.

3

I V S T A

*Funeri*

ILLVSTRISSIMI PRIN-  
CIPIS, AC DOMINI, DOMINI

CHRISTOPHORI

RADZIVILI, DVCIS BIR-  
ZARVM ET DVBINKORVM,

Palatini Vlnensis in magno du-  
catu Lithuanix, Sacri Roma-  
ni Imperij Principis

SOLVTA

*In Academiâ Lipsiensi, Anno*

*1604. Mensè Ianuario.*

MATTHÆO DRESSERO.

In fine accesserunt Epicedia quædam in  
obitum Laudatis. Principis, à Professo-  
ribus dictæ Academiæ conscr.

L I P S I A E.

*Imprimebat Michael Lantzenberger, Anno 1604.*

3

# ILLVSTRISSIMO

PRINCIPI AC DOMINO, DO-  
MINO CHRISTOPHORO RADZIVILO,  
CHRISTOPHORI FILIO DVCI BIRZANO  
& DVINCANO, suo Domino  
clementissimo.

**I**LLVSTRIS-  
SIME  
Princeps, Domine clementif-  
sime, commouet me celsitudi-  
nis tuae generosa indoles, ut  
non tam celsitati tuae, quam  
familiae totae officia mutua me debere profitear.  
Cum enim ab illustrissimo parente tuo, & à cel-  
sitate tuâ honorata sit Academia hac, vicif-  
sim ad honorem & studium tribuendum obli-  
gatos nos esse intelligimus. Quamobrem pla-  
cuit hanc orationem scribere, quâ & animi mei  
affectionem erga tuam Celsitatem declararem,  
& testimonium iudicij mei de parente in-  
clyto perpetuum praeberem. Dum autem ma-  
gnitudinem suscepti argumenti perpendi dili-  
gentius, duabus rebus me defici facile perspexi,

A 2 facult-

## EPISTOLA

facultate scribendi, & rerum ab illustrissimo parente tuo gestarum scientiâ. Longè enim absum, & Lithuanica historia à nemine hæcenus, quod ego sciam, satis illustrata literis est: Exceptis ijs quæ cum Polonici regni amplissimi actis communia habet. Ex eâ igitur quoad eius facere potui, nonnulla de parente, & auo celsitatis tuæ deprompta, in hanc orationem contuli: quanquam interim nullam historia partem satis persecutus sum: quod ne fieri quidem à me debuit. Strictim duntaxat quadam delibavi, ut quibus, & quantis rebus non solum interfuerint, sed etiam præfuerint illi, aliquo modo possit cognosci. Neq; etiam tam copia orationis, quam voluntas propensa & grata fuit declaranda. Quam tu pro tuâ equitate, & clementia in eam partem accipies, ut & latari nostro studio videaris, & nos gratam recordationem tui nunquam ex animis effluere patiamur. Iucunda erat omninò coniunctio duorum magnorum principum uno eodemq; tempore in hac Academiâ viuentium, celsita-

tis

## DEDICATORIA.

tis tuæ, & Philippi Iulij Pomerania ducis illustrissimi, beneuolentia mutua, conuictus suavis, idem utriq; propositum peregrinandi & gentium, populorumq; mores, studia, vrbes visendi. Et quidem in unum tempus utriusq; discessus à nobis incidit. Peragrastis ergo tempore benè longo regiones Europæas, adiistis principes, conuenistis reges, cognouistis populos, conciliastis vobis ducum, & regum amicitiam, vidistis pacis, & belli artes, perspexistis sustinendarum obsidionum pericula, & hostes adoriendi, arcendiq; studia tanta, quanta vix vlla etas vidit. Peregrinationis quoq; idem penè utriusq; exitus fuit, ut ad gubernationem paternarum ditionum in patriam reuersi tandem accesseritis. Utrique etiam oratio à me composita est, quamuis dissimili argumento & fine. Pomerania enim duci Philippo Iulio in actu Rectoratus, quem lubenti animo susceperat, gratulatus sum oratione ad tempus lectum accommodatâ. Tuæ verò celsitatis paterno funeri iusta hac oratione soluo, in eum finem

A 3 dire-

EPIST. DEDICATORIA.

directa, ut luctus eius solatio aliquo leuetur. Fit enim iure quodam natura nostra, ut, quemadmodum res sese dant, ita magni quoque, atque humiles simus. Ac principi quidem Philippo Iulio gratulatoriam orationem vehementer acceptam fuisse ex vultu celsitatis eius serenissimo deprehendi potuit. Quare nec tua celsit. ingratam fore mœstitia nostræ in paterni funeris luctu declarationem confidimus. Quod verò huic orationi mea deesse videbitur, id suâ copiam, & obertate compensare poterit Salomon Risinky studiorum, & consiliorum celsitatis tuae informator fidissimus. Vale. Lipsia in die, quo Paulus ex hoste Christi accerrimo factus est Apostolus gentium saluberrimus, Anno 1604.

T. Celsitatis

studiosiss.

Matthæus Dresserus.

ORA-

O R A T I O.

**R**EDO IVCVNDAM RECORDATIONEM illustrissimi ducis CHRISTOPHORI RADZIVILI in mentibus plerorumque nostrum adhuc versari. Sic enim in hac Academiâ viuebat, & studia literarum tractabat, ut non facile ex animis nostris effluere memoria illius possit. Elucebat in eo eximia spes, summa ingenij indoles, eminens virtutis effigies, domestica disciplina liberalis, institutio ingenua, discendi cupiditas singularis, admiranda clementia, iudicij dexteritas, eloquendi prompta facultas. Disputationum exercitationibus delectabatur, sed eruditis, & placidis, à rixis verò, & contentionibus alienum habebat animum. Id quod etiam Isocrates scribens ad Alexandrum, decere principem maximè censet. Lites enim Sophistarum sunt, collationes verò sobriæ, graues, & verecundæ sapientum. Laudatur à Dione Hadrianus Imperator, quòd naturâ fuerit amans literarum, & multa scripta partim soluta oratione, partim carmine composita reliquerit. Cuiusmodi studium philologiæ vocabu-

lo no-

lo notatur, & principibus viris maximè dignum est. Et si enim carminis scribendi laborem fortè non attingunt, eloquendi tamen cultum capessunt, & quæ cognita, perspectaq; habent, ea politè, sapienterq; efferre posse laudi sibi ducunt. Cui quidem studio deditum fuisse ducem Radziuilum, quoad apud nos commoratus est, meminimus. Non enim artium tantum doctrinam, sed sermonis etiam latini facultatem sitienter expetiuit, atq; etiam assecutus est. Expleto autem curriculo plùs quàm annuo, ad alias gentes atq; nationes adiit, vt & rerum scientiã sese augetet, & varietatem ingeniorum, atq; morum in alijs atq; alijs populis cognosceret. Atq; in hac quidem peregrinatione non Germaniæ solùm principibus sed etiam nonnullis regibus sic innotuit, vt carus, iucundusq; compluribus eorum factus sit. Interea dùm in oculis Germaniæ quorundam principum fertur, & in suauissima consuetudine eorum hæret, nuncius tristis de obitu parentis eius Christophori Radziuili ad eum affertur, quo accepto ocyus ad nos reuersus pristinam consuetudinem paucis quibusdam diebus subsistens renouauit, & amorem, clementiamq; suam in Academiae Professores documentis illustribus declarauit: dolorem tamen suum ex obitu tam

illu-

illustri parentis minimè dissimulauit, sed moerorem iustum, & filio generoso dignum præse tulit. Cuius quidem ægritudinis cum societas quasi quædam ad nos pertineat, iure vicem eius doluimus, communemq; cum eo tristitiam cepimus. Cùm enim membrum huius Academiae sese professus sit, & communi iure vniuersitatis nobiscum vixerit: æquum esse duximus, vt læta, pariter, & tristia cum eius celsitate participemus. Quod cùm ita sit, documentum aliquod doloris nostri æquissimi statuendum esse putauimus, ex quo palàm fieret, quantum illustriss. parenti mortuo debeamus. Quid autem conferre in inclyti & fortissimi ducis manes possumus iustius, & professione nostrâ dignius, quàm si acta eius, & merita præclara in patriam gratâ prædicatione celebremus?

Christophorus Radziuilus Birzarum & Dubinkorum dux in Lithuaniam, sacri Roman. Imperij Princeps, Anno Christi 1547. natus est patre Nicolao Radziuilo Birzarum & Dubinkorum duce, Vilnensi palatino, matre vero Iuvinicia sceminâ illustri, & generosâ. Ab his parentibus generosè & ingenuè educatus Christophorus filius à teneris vnguiculis eruditus est ijs artibus, quæ ad intelligendum, & iudicandum

B

recta



recta ducunt. Ipseque adeo simul atque adolescens esse cepit, magna spectauit, ad eaque omni studio contendit. Quod eò facilius facere potuit, quod patrem Nicolaum ad omnia præclara ducem habuit. Is enim mature labores militiæ suscepit, ad eosque etiam filium Christophorum adhibuit. Specimen dedit illustre, cum post mortem Sigismundi regis, interregni tempore, Mosci in Russiæ fines infusi tumultuarentur. Contra hos enim cum copijs quibusdam missus magnâ felicitate impetum illorum repressit, eaque in re pietatem in tuendâ patriâ eximiam declarauit.

Dum ad Gedanum Rex Polonorum Stephanus castra habuit, & hostis irruentis fama late manauit, nobilitatem Lithuanicam datis literis euocauit, & militare imperium per ducatum illum Nicolao Radziuilo, Vilnensi Palatino tradidit: qui cum exercitu non exiguo voluntarij militis ad eum accurrit. Deinde, cum Ioannes Chodkeuitius Leopoli administratione Lithuaniae sese abdicasset, administratio illius prouinciæ eidem Radziuilo commendata est, qui Christophoro filio aulicæ militiæ per Lithuaniam præfecto exercitum, qui in Liuoniâ fuerat, tradidit. Hunc ille Derpatum usque adduxit, prouinciâque hostilem populatus est. Tùm ad Kirempesium excurrit,

idque

idque adortus cepit, atque evertit. Inde ad regem, tùm Vilnam ad patrem reuersus est cum exercitu, ut militi stipendia merita persoluerentur.

Secutum est non multo post bellum cum Moscis gestum. Ad quod cum necessaria præsidia compararentur, & de summa belli consilia caperentur: Rex Svirum vocauit Lithuanicum equitatum, ubi spectaculum iucundissimum vidit, cum gens Radziuila, & Ioannes Khiska structor regius equitatum in conspectum regis adduxerunt, omnibus rebus probe instructum, atque armatum. Decreta iam & suscepta expeditione Moscica, tanquam dux itineris, & rei bene gerendæ auctor præmissus à rege est Radziuilus, cum Christophoro filio Polotiam, cum Lithuanicis quibusdam copijs, & equitatu Vngarico, cui Bekesius præerat, ubi viam subsequenti exercitui muniuit. Inde causa dissimulandi, & præripienti hostis consilia in Moscouiam impressionem fecit, multa vastauit igne, & ferro, tantumque effecit, ut hosti, qui terror Christiani orbis antea fuerat, terrori esset, nec pedem inde retulit, priusquam VVolgæ fluminis, vtramque ripam populatus esset.

Hostis verò iam Plescouiam progressus partem aliquam copiarum in Lithuaniam misit, quæ excurrerunt & agrum Birzanum Christophori

Radziuili populati sunt: At missus à rege Ioannes Taluossius Samogitiæ Castellanus hostilem impetum à ceruicibus incolarum propulsauit. In ipsa verò oppugnatione Polotiæ locum à rege proximum Radziuilus tenuit, & cum subsidia Moscus obsessis misisset, Christophorus Radziuilus cum aliquot alis equitum lectis occurrit, atque restitit. Venit ad regem legatus ab Henrico ordinis Teutonici Magistro missus: vbi cum difficultas magna belli Liuonici sese offerret, consilium dedit Radziuilus, vt Adolphus Holsatiæ dux feudi iure Liuoniam sibi à rege dari peteret, operamq; & fidem suam in ea defendenda contra Moscum polliceretur. Quod consilium, ad reparandam quietem, & ad minuendos sumtus, atq; pericula directum erat. Sed eo tempore ad comitia deliberatio eius tota reiecta est.

Postquam Polotia, & Sokola DEI permissu, quemadmodum Moscus ipse in literis suis locutus est, in Polonorum potestatem redacta est, periculum sibi metuens tyrannus ille in interiorem Moscouiam, vbi se tutiorem fore sperabat, confugit. Rex verò bellum persecuturus Varsovia in conuentu de Lithuania tuenda & ab hostili impressione defendenda consilium cum Senatoribus iniit: decretumq; est, Radziuilo Vilnensi

Palatino, qui cum imperio militari erat, curam illam committendam esse: & quidem in magistratibus, qui vacabant, distribuendis, Radziuilis partes primæ fuerunt datæ. Quæ tametsi strictim tantum à nobis attinguntur, nec pro dignitate, & magnitudine enarrantur: tamen, quanta auctoritas ducis Radziuili, cuius acta celebramus, tam in consultationibus, quàm in officiorum muneribus fuerit apud suos, aliquo modo demonstrant. Quanta autem eadem apud hostes fuerit, cognosci potest ex Mosci literis, ad Nicolaum Radziuilum Vilnensem palatinum, & ad Eustachium Volouicium Trocensem castellanum datis, quibus petit, vt pacis autores, & suasores esse apud regem velint, ne plus sanguinis profundatur. Eum scilicet iudicauit barbarus ille Radziuilum esse, qui suo consilio, & oratione regis mentem iusta quadam vindictæ cupiditate incensam mitigare posset, & ad pacem faciendam flectere.

Atq; hæc, quæ de Nicolao patre Christophori Radziuili commemorantur, ad laudem totius familiæ, maximè tamen ad decus filij pertinent. Responsum autem, quod Mosco tunc datum est, à senatoribus Lithuanicis, huiusmodi fuit, vt intelligeret princeps ille magnus, non Polonos sed Moscos belli autores esse, nec regem à pace

alienum habere animum, sed lacepsitum ab illo iniurias iusto bello persequi debere, ac velle. In expeditione, & profectioe ad Vfuatam, & Lukos iterum agmen primum Palatinus Vilnensis, & filius eius Christophorus limitanei militis præfectus duxerunt. Ad Pleskouiam Rex erat, cum ad eum allatum est, exercitum hostilem in Mohilouensem, & Scouensem agrum irruisse. Illico Christophorum Radziuilum, qui tunc Disnæ erat, cum aliquot turmis equitum Polonorum, quæ in locis ad Borysthenem hibernabant, cum peditatu aliquo, & cum leuibus tormentis misit, in mandatisq; dedit, vt in hostem rectà iret, et, si ferret facultas, prælio cum eo decertaret. Plura multò in hoc Moscico bello acta ab hoc Christophoro prætermittuntur à nobis: & iam in eum locum res tota erat adducta, vt, interponente se in pacificationem pontifice Romano, pax vtrinq; constitueretur. Hæc verò quæ summatim exposita sunt, eò pertinent, vt, quanta industria, autoritas, atq; felicitas tam patris Nicolai, quam Christophori filij Radziuili in hoc bello eminuerit, ostendatur.

Ad exitum vitæ vocatus est Nicolaus Radziuilus Anno 1594. Aprilis die 27. cuius quidem herois obitus luctuosus inprimis fuit regi, & fune-

stus

stus patriæ: Sed eò tamen tolerabilior, quòd filium reliquerat, paternum ingenium, virtute, & industria adæquantem, vel certè ad id proximè accedentem. Cuius documenta illustria iam tum in Moscico bello, inspectante, & comprobante rege totoq; exercitu dederat. Itaque patris successor in honoribus, & muneribus à rege declaratus est, vt & Vilnensis palatinus, & exercituum præfectus generalis per Lithuaniam esset. In quo quidem officio sic versatus est, vt eius integritas, industria, fides, toti reipublicæ probaretur. In prouidendo enim consilium, in agendo dexteritatem, in conficiendo celeritatem adhibebat. Præclara sunt opera publica, & priuata Vilnensi palatino, & militia generali præfecto obeunda. Nam & consilia de ducatus Lithuanici salute, & incolumitate parte non parua ab eo gubernantur, & ad societatem administrationis regni totius tam pacis, quam belli temporibus vocari solet. Sæpè accersitur ad comitia, non rarò ad arcendos hostium impetus, & ad tutandos fines tam ducatus, quam regni destinatur.

Prædicatur, laudibusq; miris celebratur rara, & eximia illius ducis Christophori comitas, mansuetudo, humanitas, quibus virtutibus ita excelluit, vt exteris etiam nationibus non notus

tantum

tantum, sed etiam iucundus fuerit. Misit pro admirabili suo in literas bonas amore in hanc Academiam filium suum Christophorum Radziuilum Birzarum ducem, cuius & animi & ingenij celeres quosdam motus deprehendimus, quos ad excogitandum acutos, ad explicandum expeditos, ad memoriam deniq; firmos esse perspeximus. Quanquam autem non solum principia literarum, sed progressiones etiam præclaras ad nos attulit: tamen de studio vberioris ingenij cultus capiendi nihil apud nos remisit, ut, quantum patriæ lumen futurus sit, diuinare non sit difficile. Atq; in hoc solertissimus, & gloriosissimus pater maiorum suorum Radziuilorum exempla imitatus est, quorum nonnulli in hac quoque Academiâ literarum doctrinâ liberaliter animum suum expoliuerunt. Quod quidem illius de literis nostris iudicium non possumus non summis efferre laudibus.

Compertum est, gentem Polonicam & Lithuanicam non alienam esse ab hac Academia, quippe, cuius copia semper ferè aliqua apud nos inuenta est. Oratoriam, & historicam facultatem cum sermonis latini scientia potissimum ea expetit. Hæc enim adiumenta sunt ingenij, industriæ, & rerum agendarum. Quæ cum in hac

Academia tradita sint, & adhuc in promptu sint cuius, caussa non est, quare ab ea abstinere vllus sapientiæ, & eloquentiæ studiosus velit. Nec in literas solum amorem suum declarauit Christophorus dux noster inclytus, sed doctrinæ quoq; religionis custos diligens, & constans in suis ditionibus extitit. Qua quidem laude præstantior nulla esse potest in homine principe præsertim, qui non ipse tantum religione rectâ beatus esse potest, sed subditis etiam ad salutem veram dux, & autor est. Si enim religio, & fides principis verbo DEI consona non est, non se ipsum tantum à DEO auellit, & pœnas æternas sibi accersit, sed id ipsum virus quoq; in subditos infundit, & cum multitudine ingenti in infernum ruit. Solent pericula certaminaq; obijci religionem profitentibus, ad quæ subeunda paratos animos habere eos oportet, nec metu vlllo fractos professionem abijcere. Quod fecisse ducem Christophorum multis rerum argumentis probari potest. Nam hostiles incurfus sustinuit, & à se, suisq; vim omnem propulsauit.

Exarsit anno Christi 1600. in Liuoniâ bellum à Carolo Sueco Sudermaniæ duce accensum, qui errore quodam opinionis sibi fortè persuaserat fore, ut finitis inducijs in Poloniam erumpe-

rent Mosci: quanquam metu etiam sese impulsam esse dicebat ad inuadendum Liuoniam, ne scilicet arces & oppida, quæ illic haberet, à Polonis adimerentur. Hæc igitur Suecorum in Liuoniam irruptio, iusta arma induit Christophoro Radziuilo generali exercituum per Lithuaniam ductori, & ad tuendam Liuoniam arcendosq; hostes expeditionem suscipere coëgit. Erat autem regius in Poloniâ præfectus Georgius Farensbeckius bellator egregius, vir cautus, & prouidus, cum quo copias suas Radziuilus coniunxit, & in hostem animo forti, & alacri iuit. Ac in primis Farensbeckius cum aliquot millibus Suecorum congressus, fudit eos impedimentisque illorum potitus est: quanquam etiam suorum non paucos amisit.

Obsidebat ea tempestate Carolus Derpatum, & 7000. homines VVendam misit, oppidum non admodum munitum. Hi à Polonis circumfusi in flumen adacti sunt, vbi fractâ glacie, partim suffocati, partim cæsi. Ineunte autem vere Lithuaniae dux Christophorus Radziuilus exercitum fermè 6000. virorum in Liuoniam adduxit & Kokenhusium circumfedit, tantaq; vi, & impressione oppugnauit, vt per deditioem voluntariam ceperit, & promiscuè omnes in eo inuen-

tostrucidari iusserit. Conati quidem sunt Sueci obsessis subuenire, sed repulsi à Radziuilo viros multos amiserunt. Fretus hac opportunitate Radziuilus VVendam à Suecis relictam recuperauit.

Tùm Ronneburgum obsidione cinxit, & emisâ suorum parte quadam, loca complura occupauit, nonnulla impositis præsijs muniuit, alia incendio vastauit. Rigam postea inuadere cogitauit Carolus adductis equestribus copijs, & legionibus peditum quinque. At, vt conatibus eius obuiam iretur, præsidium mille virorum ex Germanis, & Scotis collectorum vbi impositum est, locatisq; ad eam castris probè munita est. Nec multò post Polonica auxilia accesserunt, quibus territi Sueci obsidionem soluerunt.

Et si autem hoc Liuonicum bellum magnâ varietate fortunæ gestum est, modò ad Suecos, modò ad Polonos inclinante victoriâ: tamen eluxit in eo celsitas, & magnitudo animi tam Radziuili quam Farensbeckij, & Zamoscij Cancellarij magni, ad eò vt prædicatione, & memoriâ posterorum digna sit. Radziuili equidem integritas, industria, felicitas, & moderatio multis magnisque rebus spectata est. Victoriâ sæpè vsus est, sed abusus nunquam. Id quod in magno principe comprimis admirabilitatem magnam facit.

Suâ quippe naturâ insolens, & superba est victoria, & insolentes plerunq; reddit eos, qui eâ potiti sunt. Quò sanè maior laus debetur ijs, qui sic eâ uti sciunt, ut nihil superbè, nihil immoderatè agant. Quanquam natura etiam hic dux Radziuilus adeò clemens, humanus, æquus, & liberalis fuit, ut charus iucundusq; fuerit bonis omnibus, aduersus, & inuisus nemini, nisi improbo. Ex quo etiam id boni tanquam ex fonte quodam sacro manauit, ut neq; alijs iniuriam faceret ipse, neq; illatam aliunde iniuriam persequendam acerbè esse censeret. Itaq; factum, ut vindictam, & animaduersionem, quâ uti poterat, libenter sæpè remiserit, & condonârit.

Consuetudinem, & amicitiam cum bonis quibusq; libenti animo iungebat, iunctamq; voluntate constanti tuebatur, & officiorum communicatione mutuâ confirmabat, augebatq; que. Abfuit ab eo morositas, alienum fuit fastidium: comitatem, & affabilitatem cum grauitate perpetuò coniunxit, ut verè in illum quadret illud Menandri: quàm dulcis est sapientiæ & bonitatis coniunctio. Non fraus in moribus, non dolus in sermone, non fucus in gestu, & vultu deprehendebatur. Quò enim quisq; vir melior est, eò studiosius occultationes insidiosas & simulationes odit,

atq;

atq; fugit. Non necesse est regum & principum magnorum exempla accumulare. Quod si fieret, comparatio splendida & iucunda multorum, qui in pace, & bello excelluerunt, cum hoc Radziuilo institui posset. Verùm non id agimus, ut ascito quodam colore hunc principem ornare velimus, cui natiua decora abundè suppetunt, quæ illum viuum extulerunt, & mortuum non deserunt. Comitatur enim virtus virum bonum, & existimatio præclara vsque ad rogam profequitur.

Iustitiæ, quæ vna virtutum omnium regina est, curam magnam habuit, cauitq; diligenter, ne cui iniuriam inferret, sed potius illatam à suis subditis, & patriâ depelleret. Hæc enim duo sunt illa iniustitiæ genera secundum Ciceronem, quæ vitare iustum principem studiosè oportet, ne cui scilicet iniuriam faciat, & ne vi iniustâ circumueniri, aut opprimi sibi commissos sinat. In quam quidem curam sedulò operam dedit Radziuilus, ut ne grauatus iniusto onere, nec desertus in bonâ causâ quisquam videretur. Cùm etiam in omni gubernatione bonitas, & clementia in tuendis, & conseruandis sanabilibus multò vtilior sit ad retinendum imperium, quàm rigor & iniusta seueritas: æquitatem semper rigori prætulit, &

C 3

sum-

summi rigoris acerbitatem ἐπιεικεία mitigavit, ac temperavit. Quod faciendum esse cuique bono ciui, & reipublicæ moderatori apud Thucydidem libro 3. in concione suâ docet Diodotus. Nec exactiōibus immoderatis subditos exhaustit, sed tanquam bonus patriæ terræ cultor paterno animo subditis suis consuluit, salutem patriæ prospexit, & ut victus honestus, & necessarius suppetere, operam dedit, ut nihil à bono patrefamiliâs differret.

Pro patriæ libertate acrius, quàm pro vitâ ipsâ propugnauit, nec committendum sibi esse duxit, ut imminutam illam vllâ in parte posteris suis traderet. Compertum est id cum aliâs, tum non multos ante annos, cum de Vilnensi episcopatu in Lithuaniam certamen acre exortum est. Lithuanicæ enim reipublicæ interest, ne ad externum vllum dignitas illa transferatur. Rex verò & cum eo alij multi omni ope, & opere enitebantur, ut Bernardus Maciejousky Polonus inferretur atque intruderetur. Quod cum iuri & libertati gentis Lithuanicæ contrarium esset, summâ contentione dux Christophorus pugnabat, ut, repudiato extero, Benedictus VVayna Lithuanus episcopatum consequeretur. Idque etiam obtinuit, & documentum illustre dedit, quanti referat, patriæ

iura,

iura, immunitates, & libertatem tueri, etiam contra eos, quorum potentia formidabilis esse non parum videtur. Ciceroni non fuit criminofum patriæ libertatem contra Antonium in republ. Romanâ defendere. Nec vitio datum est Demostheni Atheniensium gubernatori, patriæ dignitatem, & iura contra Philippum Macedoniae regem tueri. Ergo nec Christophoro duci suum studium libertatis ducatus patrij defendendæ fraudi esse potuit. Sæpè enim reges boni, iusti, & moderati sunt, sed aliorum impulsu deflectuntur. Hic nisi sint, qui pro priuilegijs & libertate propugnent, iacturam fieri magnam necesse est. Ex quo cognosci potest, quanti referat, principes, atque alios ciues bonos pro patriæ suæ libertate certamina, & si necesse sit, etiam pericula subire. Neque omnis defensio libertatis patriæ est habenda rebellio. Caret enim huiusmodi defensio acerbitate, odio, & nocendi cupiditate, nec excludit amorem, & obedientiam magistratui debitam, sed ea potius moderatione suscipitur, ut magis permessa à rege iusto quàm vindicata ab eo videatur, quemadmodum de Hephestione Alexandri magni duce Quintus Curtius scribit.

Quemadmodum autem secunda aliqua euenire principibus bonis, sic etiam aduersa plurima

ijsdem

## O R A T I O

ijſdem accidere ſolent. Fieri enim aliter non po-  
teſt, quàm vt omne, quod bonum eſt, à vitijs v-  
trinque oppoſitis impugnetur. Et cui proſpera  
ad tempus eueniunt omnia, is ad extremum ma-  
lorum quaſi quodam turbine obruitur. Alexan-  
dro Magno annis duodecim, quibus orbem ter-  
ræ prælijs, & victorijs peragrabat; ad nutum, &  
voluntatem fluebant omnia, ad extremum verò  
non ipſe ſolùm, ſed vniuerſa etiam familia miſe-  
rè, luctuoſèq; interibat. Meliori fuit conditione  
Antigonus, qui cum vnoquoq; bono malum ali-  
quod tolerabile diuinitus ſibi dari petebat. Bene  
igitur factum, quòd huic etiam duci Radziuilo  
non tantùm felicitas in conficiendis rebus toga-  
tis, & bellicis à DEO conceſſa eſt, ſed etiam odia,  
certamina, & aduerſa multa in vitâ acciderunt,  
vt viciffitudo eſſet bonorum, & malorum, ſecun-  
dorum & aduerſorum Chriſtianiſ, & viris etiam  
magnis minimè inuſitata, ſed neceſſaria potiùs,  
& ſalutaris. Ex ijs enim, quæ patimur, erudimur,  
vt apud Herodotum Cræſus ait, vt in omni for-  
tunâ fortes & conſtantes eſſe diſcamus. Quod  
huic etiam Chriſtophoro duci diuinitus tribu-  
tum eſt, vt ſecunda, & aduerſa patienter tulerit,  
& exitum tandem conſiliorum, & actionum ſua-  
rum lætum, & ſalutarem habuerit: quod viro bo-

no,

## F V N E B R I S.

no, rectèq; ſentienti plerunq; vſu venire dux for-  
tiſſimus & ſapientiſſimus Artabanus apud Hero-  
dotum aſſeuerat.

In matrimonio etiam fortunam variam ex-  
pertus eſt. Nam quatuor vxores duxit, vnam An-  
nam, ex illuſtri & generoſâ gente Sobkouiorum,  
ſecundam Catharinam, illuſtriſſimi principis  
Constantini ducis Oſtrogiæ palatini Kuouienſis  
filiam, tertiam Catharinam Comitis à Denczyn  
filiam Simeonis Slucenſis relictam viduam,  
quartam Eliſabetam Catharinæ coniugis ſecun-  
dæ ſororem illuſtris domini Samogitiæ præfecti  
relictam viduam. Liberos reliquit generoſiſſi-  
mos, illuſtriſſimum principem Ianuſium, Bir-  
zarum, & Sluciæ ducem Anno 1579. Iulij die 22.  
ex ſecundo matrimonio natum, qui vxorem du-  
xit Sophiam Slucenſis ducatus vnicam, & vlti-  
mam hæredem, Anno 1600. Octobris die primâ.  
Ex coniuge terciâ ſuſcepit filiam Eliſabetam no-  
mine, quæ 13. Decembris Anno 1583. nata, An-  
no 1599. Iunij die vicesimo, illuſtri domino Leo-  
ni Sapiehæ magni ducatus Lithuaniae cancellario  
nupta eſt. Ex eadem coniuge natus illuſtriſſimus  
princeps Chriſtophorus, Anno 1585. Martij die  
22. non ſolum idem cum patre generoſiſſimo no-  
men habet, ſed eandem etiam indolem ad virtu-

D

tem



ORATIO FVNEBRIS.

tem præ se fert, & sapientiæ magnanimitatisque  
spem minimè fallacem, tum in rebus gerendis in-  
dustriam, & felicitatem liberalissimè pollicetur.  
Beatus igitur dux Christophorus Radziuilus, qui  
ducem filium Christophorum post se reliquit, a-  
nimi, & heroicæ fortitudinis, felicitatisq; suæ æ-  
mulum, atq; imitorem optatissimum. In hoc  
suauiter acquiescēs ex hac mortali vitâ in immor-  
talem migravit, Anno Christi 1603. Nouembr.  
die 20. & suis quidem mœrorem, luctumq; acer-  
bum, sibi verò celebritatem nominis,  
& famæ nunquam intermoritu-  
ræ reliquit.

F I N I S.

ERRATVM.

*Litera B fac. 2. lin. 20. lege Liuoniæ.*



⊙ P H N O I

In obitum

ILLVSTRISSIMI PRINCIPIS  
AC DOMINI, DOMINI

CHRISTOPHORI  
RADZIVILI DVCIS  
BIRZARVM A' DVBINKIS,  
&c.

*Autorum diuersorum & Professorum  
in Academia Lipsica.*




ANNO

M. DC. IV.

E

IOH N O I  
 In obitu  
 Illustrissimi Principis  
 ac Domini Domini  
**CHRISTOPHORI**  
 Radvvili Ducis  
 Birzarum & Dvinkis  
 Comitis in Schidlovitz, Palatini Vilnensis  
 dignissimi, &c.  
 ARA  
 M. DC. IV.  
 B



IN OBITVM

Illustrissimi & maximè inclyti Prin-  
 cipis ac Domini, Domini

**CHRISTOPHORI RADVVILI,**  
 DVCIS BIRZARVM ET DVBINKIS,  
 Comitis in Schidlovitz, Palatini VILNEN-  
 sis dignissimi, &c.

ἔπιγραμμα.

*Q*Uē pietas, Regniq; fides, generisq; propago  
 Inclyta, quem celebrat Martis & artis honos,  
 Christophore ð Radvvile Ducum Dux inclyte, vitæ  
 Stamina ducentes, sed moriēre, sonant.  
 Bellona at laudes, & quæ, pia Numina, amāsti,  
 Æternum propria laude perire vetant.  
 Sic virtus lethi superat vim, conscia iusti  
 Mens, iustum tete sistit & ante DEVM.  
 Litale plange Ducem: Regni iacet altera dextra:  
 Plange, iacet summi relligionis honor.  
 Sistite Pierides planctum, & Mauortis alumni  
 Sistite, viuit adhuc laus, Pietasq; fides.  
 Mortale hic tantum liquit, sed viuida virtus  
 Viuit, & ante homines, viuit & ante DEVM.

In pientis. memoriam, beneficiorum  
 in se regiè collatorum memor lu-  
 gens P. Franciscus Romanus in  
 Muckershausen, Illustris. & po-  
 tentis. Elector & Ducum Saxonie  
 Confiliarius.

ARA DVCIS CHRISTO-  
FERI A RADZIVIL.

Contegor hoc princeps tumulo, & quæ princi-  
pe dignæ

Virtutes, belli & pacis uterq; parens.

Nec bello formidavi, nec pace quievi;

Pace tamen per me terra potita mea est.

Talis eram PATER unus, erit quoq; FILIVS alter,

SIC PATER IN NATO EST, IN PATRE NATVS ERIT.

*Jacob Schultes, D.*

Lituaniæ occubuit Princeps, fortissimus Heros,  
Quem Mars non potuit vincere, Morte cadit.

Princeps pace bonus, bello haud superabilis vlli,

Siue feros contra pergeret ire Getas.

Hunc Thrax crudelis metuit, metuere Trionum

Gens habitans claro sidere seuæ virum,

Palladiæ artis pugnans è Palladis arce

Excoluit, studio iuuat, amore fovens.

Ergo hunc Germanus doleat, doleatq; Polonus,

Palladiæq; edant tristia signa Deæ.

Princeps Lituaniæ occubuit, fortissimus Heros,

Quem Mars non potuit vincere, morte cadit.

Ioachimus Tanckius D.

Anatomes & Chirurgiæ Profes-  
sor Pub. in Academia Lipsiensi.

Insignes

Insignes lugere viros meritisq; potentes,  
Quos mors è terris abstulit atra, pium est.  
Sunt hi sunt generis gemmæ mortalis, & orbem  
Illustrare velut lucida stella solent.

Illustris factis, illustri stemmate natus

CHRISTOPHORVS mortem sic RADEVILVS obit.

In luctuq; suos desiderioq; relinquit,

Antehac qui generis firma columna fuit.

Flete piæ Musæ, longos & ducite luctus,

Iusta nimis vobis causa doloris adest.

Dum vixit doctos homines RADEVILVS amavit,

Munifico clarium fouit & ære chorum.

Propatria pugnas RADEVILVS, pectore forti

Cum vario toties contulit hoste manus.

Sinceræ illius quæ recta ducit ad astra

Curæ ipsi fuit & relligionis honor.

Inq; fide CHRISTO firma constanter adhæsit,

Supremum vitæ tempus adusq; suæ.

Corporeis liber vinculis hinc arce receptus

Ætheria præsens conspicit ille DEVM.

Nec verò totus perijt, manet inclyta fama,

Quam delere adeò nesciet vlla dies.

Nec satis hoc: terris summa virtute reliquit

Natum, cui patrius fulget in ore vigor.

Dij faciant viuens ut longos sospes in annos

Præclari generis sit maneatq; decus.

*M. Iohan. Albinus, poëticiæ Pro-  
fessor in Acad. Lips. publicus.*

LITVANIAE PLANGOR,  
 In obitu  
 ILLVSTRISSIMI, POTENTISSI-  
 MIQVE PRINCIPIS AC DO-  
 mini, Domini  
**CHRISTOPHORI RADZIVIL**  
**SENIORIS, DVCIS IN BIRZE**  
 ET DVBINKI, &c. PALATINI VILNENSIS,  
 Domini quondam pientissimi  
 & clementissimi :  
 ET EIVSDEM VOTVM ;  
 Cùm illustrissimæ Gubernationi pa-  
 ternæ successurus esset illustrissimus, generosissimusq;  
 Princeps ac Dominus, Dom. CHRISTOPHORVS  
 Junior, Dux in Birze, &c. Dominus  
 clementissimus.

*Siccine CHRISTOPHORVS senior, Palatinus in oris  
 LITVANIAE occubuit ? quo non illustrior alter  
 Dux erat, excelsiq; animi vi clarior Heros ;  
 Inter RADZIVILES ter maxima gloria, morbo  
 Difficili, mortisq; potenti cuspide fixus,  
 Siccine nunc terras inopinâ morte reliquit ?  
 Quis mihi subiectæ TELLVRI prabeat undas ?  
 Quisue meis oculis lachrymarum flumina subdat ?  
 Vt desiderium tanti DVCIS, atq; dolorem  
 Imis visceribus conceptum effundere possim ?  
 Va mihi tam miserè in luctus squalore iacenti,  
 Orbatq; duce, ac patria PATRE, qui caput hosti  
 Obiecit toties, vt dulci pace liceret*

Vsq;

*Vsq; frui mihi, nec quassata turbine rerum,  
 Relligio, cultusq; DEI, Pietasq; deesset :  
 Qua nunc circumspicit, & alium poscit asylum  
 In terris metuens furias, morsusq; luporum.  
 At tu diue Pater, DVX ô fidiissime quondam  
 Securus terræ, & patriæ securus amorum,  
 Nunc in celesti Regumq; ducumq; Sacrorum  
 Iosia, Ezechiâq; manes latante coronâ,  
 Conspectuq; DEI frueris, donec tuba magno  
 Arida defuncti clangore resuscitet ossa.  
 Va mihi deserta, quàm contabesceret imo  
 Pectore viva mihi vis, & spes omnis abiret,  
 Immaniq; gelu formido resolveret artus,  
 Nî bonitate DEI celso de sanguine RADZIVIL  
 CHRISTOPHORVS mihi Magnanimi PATRIS inclyta proles  
 Ceu clarum sydus per densam affulgeat umbram,  
 Qui nunc jure suo patrias moderetur habenas.  
 Hic est, hic PRINCEPS in quo speciosa renidet  
 Illustri velut in speculo GENITORIS imago ;  
 Qui belli ac pacis solers acquisijt artes,  
 Communem vt posset patriæ stabilire salutem  
 Consilio, atq; hostes dextrâ frenare potenti.  
 Hunc Europææ Musæ erudière per artes,  
 Quæ formant, mentemq; & mitia pectora reddunt,  
 BELGICVS HUNC VICTOR famâ super æthera notus  
 MAVRICIVS, quem nunc felici Marte tonantem  
 Degeneres animi metuunt, fugiuntq; trementes ;  
 Bellandi edocuitq; modum, variasq; figuras.  
 Expectatus ades Princeps, votisq; petitus  
 In te oculos verto, teq; unum admiror euntem,*

LITVA-

LITV ANICI proceres mecum, atq; Polonides ora  
Suspiciant, regniq; exordia fausta precantur.  
SIS PIVS & felix, nec non DVCE & auspice CHR ISTO,  
Quem fidente tuo clausum sub pectore gestas,  
MARTIS & artis opus generoso suscipe motu.  
SIS PIVS & FELIX; sic famam equabis Olympo,  
Et mirabuntur serii tua facta nepotes.

Ioannes Neldelius Glogouienf.

Aristotelicæ Philosophiæ in Aca-  
demia Lipsica Professor.

IN TVMVLVM ILLVSTRIS-  
SIMI PRINCIPIS CHRISTOPHORI  
RADZIVILI, Ducis Birzarum &  
Dubinkorum, &c.

Mole sub hac recubant laudati Principis ossa,  
Quo se iactabat Sarmatis ora DVCEB.  
Viuo illo, vixit Pax aurea, & extulit alte  
Diva Astræa suum Relligioq; caput.  
At postquam excessit terris, passim omnia moerent;  
Squalet ager, squalent, curia, templa, domus.  
Vnica spes superest, patriti nominis hæres,  
RADZIVILIDUM illustri è stemmate CHRISTOPHO-  
Hoc Duce pax rursus, pax aurea surget, & alte (RVS  
Frontem Astræa suam Relligioq; feret.  
Dij saluum hoc præstate caput, quo sospite Gentis  
Sarmatidos stabit fama, cadente cadet.

M. Ioan. Fridericus,  
Profess. Natur. Philos.

Est anima vinculum corpus, ceu dicere Graij,  
Musa loqui culto queis dedit ore, solent.  
Et non immerito: quia in hoc quasi carcere clausa,  
Aethereis anima è sedibus orta, latet.  
At verò nullum talis clementia cepit,  
Vt cuperet claudi carcere liber homo.  
Quantumuis igitur pietati & sanguinis arcto  
Vinclo aliquid fas sit cum ratione dari:  
Gratandum potius tamen est, quam more dolendum  
Gentili, si quis carcere liber abit.  
Quod decet, vt facias ò illustrissime Princeps,  
Ex isthoc animâ claustro abeunte patris.  
Qui non duntaxat patrij moderamina regni,  
Verum etiam dotes magni imitare patris.

Mitigandi luctus ergò humiliter mittebat

M. VVolfgangus Coruinus,  
Dial. Prof. publ. ibidem.

HIERONYMVS MEGISERVS,  
Co. P. Cesar. & Electoralis Prof. Extr. Lipsicus.

Dignum laude virum laudari à funere fas est;  
Sed laus laudati illustrior ore venit.  
Laudato placuisse viro, laus vltima non est.  
Malo bono vni, quam mille placere malis.  
Hunc itaq; auspicijs grator, Dux inclyte, faultis,  
CHRISTOPHORE, ò magno non Genitore minor,  
Qui tibi virtutis tam dignus Præco paternæ  
Contigit, & qui quod prædicat ipse facit,  
DRESSERVS: Sophia & cultæ dulcedine linguæ,  
Et varia Historiæ cognitione potens.  
Perge Patris dotes imitari fortibus ausis:  
Currenti laudes hæ tibi calcar erunt.

Nenia Funebri  
 SVB POLITILLÆ PERSONA  
 MOESTA SARMATIA, OBITU  
 tum sibi prematurum, Illustrissimi  
 Principis & Domini, Domini  
 CHRISTOPHORI RADZIVILI,  
 DVCIS IN BIRZE ET DVBINKI:  
 Palatini Vilenfis & summi Militiæ, in  
 M. D. Lituaniæ Imperatoris. Deflet.

**M**Axè nouo Roseis surgens Matuta quadrigis,  
 Aurea conuexo summorat sydera celo;  
 Purpurea summo sparsa de vertice flamma;  
 Tum propter torui resonantia littora Nepr I,  
 Mæstus agens Ichthæus ferro fallebat adunco,  
 Vsq; situbundos Nerei, vaser arte, nepotes;  
 Sollicitus Patriæ metuens, tristemq; ruinam  
 Excutiens animo Nepr I salientibus undis.  
 Ipsa autem folijs, lugubris vieta Cupressi  
 Inter & inuisi lacrymas & murmur a plandus  
 Hec memor accedens propius POLITILLA profudit.  
 Verba, prior Buxo fidus quæ inciderat Atlas,  
 Dum reget patriæ prudens moderator habenas.  
 O luctus damnate bonis: ô plena doloris  
 Tempora, quæ requies miseros solabitur? aut quis  
 Finis erit? quæ poena meos manet aspera ciues?  
 Non major (memini) diri violentia Fati  
 Heu vnquam patriæ quassauit limina terre,  
 Siue ab Hyperboreis dum Moschus surgeret oris,  
 Siue Scythes dulces si quando perureret agros,  
 Qualis quæ inuiso rapuit mihi funere Daphnin,  
 Daphnin, cui robur firmum, cui viuida virtus.  
 Venturos Pily spondebant Nestoris annos.

Quam

Quam subito occubuit Patriæ spes maxima nostræ?  
 Heu mihi me miseram in tanto feruore malorum,  
 Plurima quæ circumstant, quis solabitur? aut quis  
 Optatas desperanti mihi porriget vlnas?  
 Nulla manent egram solatia: nulla quietis  
 Apparet facies: sunt omnia plena laborum,  
 Et velut insignis folijs & fructibus arbor  
 Fulmine tacta Iouis pauidos formidine quassat,  
 Agricolas: sic alma tacet Respublica damnis  
 Icta suis; stulto nisi fabula vana popello.  
 Ergo ubi cara legam vestigia Daphnidis? illum  
 An iuga Hyperboreis nunquam viduata pruinis  
 Carpati ducunt, per inhospita tesqua vagantem,  
 Ut metuo summas ne ladant frigora plantas.  
 Forsan & Eois noua regna ausurus in oris,  
 Sustinuit fragili sese committere ligno?  
 At quantus, fama est, mare desauire procellis:  
 Hic dubiæ Syrtes & saxa latentia terrent:  
 Hic rabie metuenda sua furiosa Charybdis,  
 Et peior cunctis latratu Scylla canino,  
 Horrendum resonans cœlestes prouocat auras.  
 Quid loquar innumeram monstrorum in gurgite turbam?  
 Vi metuo in medijs Echeneida fluctibus? illum  
 Fama canit validas nam sistere posse carinas.  
 Vos Pelagi indigetes, magni quos Rector Olympi  
 Oceani ingentis moderari iussit habenas,  
 Undisonas cohibete minas: componite fluctus:  
 Et fragilem seruate rarem: perducite portu  
 Optato incolumem, clementi numine, Daphnin.  
 Istula Sarmatiæ decus & dominator aquarum,  
 Balthica tartareo qui murmure stagna salutas;  
 Massouium euadens stupidum, Prutenumq; superbum,  
 Diue refer querule non cunctabundus amanti,  
 Daphnin ubi? quodnam Pelagus, quæ flumina tentet,  
 Ah fragili abstineat nimium considerare ligno.  
 Interea in virides me vertam sedula sylvas:

F 2

Si

Si quã fortè queam tristes deponere curas.  
Inter Hamadryadas, tum numina diã Napeas,  
Daphnin ego in lustris inter spelæa ferarum,  
Daphnin & umbriferæ valles, montesq; sonabunt,  
Commiserata meos fors an fera numina planctus,  
Daphnidis optati nobis vestigia dicent.

Daphni ubi es? an nemorum lustras juga summa beatus?  
An te frondosæ ducunt super omnia valles?  
Te querula in lustris, inter spelæa ferarum,  
Sive diem Titan spargit, seu lumina condit,  
Effingo; te te ingemino mea gaudia solum.

Daphni ubi es? ah trepidas quã debeo vertere plantas,  
Ut videam Diuina tui iam pignora vultus,  
Pignora livoris tumidig; expertia fastus:  
Da faciem mihi Daphni tuam; te siste vocanti.

O ubi magnificamq; animam, dextramq; potentem  
Inueniam & sancto sanctas in pectore dotes,  
Munificumq; animum: quibus hic æquare solebas  
Æthereas cœli sedes, turbamq; beatam?  
Nam quis te accessit, quem non susceperis? aut quis  
Abs te suffusus tristi mœrore recessit?  
Quem non sponte sua tua dextera iuuerit: illi  
Hac pietas innata fuit succurrere cunctis.

Daphni ubi es? ah notam iam iam mihi reddere vocem  
Dine tuam propera: nostras miserescere querelas,  
Quas surdi montes, quas umbriferæ conualles  
Admittant: neũ dure velis augere dolorem  
In mea fata meum: satis hic dependimus omnes  
Pœnarum, si quæ veteris contagio culpa  
Non elota, manus animasq; infestat inertes.  
Ah patri satis est paulum pro crimine magno  
Supplicij; iam parce tuis pater optime: da te  
Mi misera facilem, moueat lacrymosa mearum  
Te rerum facies dubijs obnoxia fati.  
Nulla mihi requies sine te speranda laborum:  
Mille meum circum steterunt caput undiq; pestes.

Hac

Hac ferus insurgit ceptam turbare quietem  
Hostis, & attentat subtilibus omnia technis.  
Parte alia quondam possessos eripit agros.  
Cumq; agris pecudes raptat vicinus, & instat  
Crudelis, quem nec pietas, nec conscia iura,  
Absterrent: quin cuncta tuis extrema minatur.  
Quid loquar Harpyias, quæ clam mea viscera vellunt?

Te moueant Cines, tanti quos vulnera planctus  
Consciant, nullamq; iubent sperare salutem,  
Te sine nil nobis nec dulce, nec utile restat,  
Omnia perpetuo sepelisti gaudia luctu,  
Mene etiam tristis post tanta incommoda vitæ  
Non potuisse, diu questam accersere mortem,  
Et felix viduas olim euitare querelas?

Te flectat pia turba, suis quæ candida votis  
Implorans deposcit opem, nunquamq; negatum  
Consilium, auxiliūq; tuum, te siste vocanti.

At ego nequicquam tenues singultibus auras  
Impleo, nequicquam bibulas efundo querelas.  
Daphnis abit: Daphnis patrias inuisere sedes  
Sustinuit, Daphnis felix super æthere regnat.  
Non illum tellus, nec habet mare, candidus alto  
Heres adscitus per Christi vulnera cœlo  
Ducitur optatis cœlestis sedibus aule:  
Et me sperati consortem expectat Olympi.

Ergo ibi miratur spatiosa Palatia mundi  
Ætherei lucemq; sacram, turbamq; beatam,  
Turbam, quæ sequitur puris in vestibus agnum,  
Sola canens Patrium festiui carminis hymnum:  
Sub pedibus volucres orbis septemplex axes,  
Et Phœben stupet, & fulgentia sidera mundo  
Perdiscitq; huius quæ sint sua semina vitæ,  
Unde olim fragile venit delapsus in artus,  
Inde illum repetam deserta in fœdera vitæ.

Quid loquor ah demens, quæ nostra insania mentis?  
Indène te repetam Daphni optime? scilicet huius

F 3

Nunc



Nunc qui te cura trahat? qui carcere tanto  
Egressus, miserirides ludibria mundi.

Ergo his exuius, atq; istis sordibus, olim  
Libera te sequar, & tecum sperata futuræ  
Consequar æternum felix & sospes in æuum.  
Gaudia, non ullis fatis obnoxia, vitæ;  
Gaudia perpetuam rerum spirantia pacem,  
Interea saluæ atq; meo vale include luctu.

### Ad animam Radziuiliam.

**S**ancta anima, & querulis iam non obnoxia fatis,  
Quæ capis æterni præmia certa boni.

Ecquid te nostri memorem cura vlla fatigat?

Auribus an sordet nostra querela tuis?

Te nobis præmaturè dessemus ademptam;

Et querimur miseros tardius ire dies.

Te præsentem quibus ridebant omnia quondam,

Omnia iam sordent ipsaq; vitæ probro est.

Cur mihi non licuit tecum sapere esse, diuq;

Perfruiet vultus commoditate tui?

Nempe sibi cælum hoc, sine te cælum esse nequibat:

At tibi cum es cælum: Tartara dira mihi es.

### LESSVS LITVANIÆ.

*Ille abiit: ego mutor.*

**S**i quis ad questus, lacrymasq; nostras,  
Mens quibus tristis superata cædit,  
Liberam curis bibulis nec ægram ad-  
Mouerit aurem:

Ille miratus calidas querelas  
Mens quibus tristis superata cædit,  
Se fuga torquens misera, suiq;  
Nescia fati,

Dicat,

Dicat, ô quanti est sapere atque amare  
Quando amor diæ rationis expers  
In nouas mutat (pudor heu referri)  
Corpora formas.

Hei mihi ô vitæ lacrymosa nostræ  
Tempora, ô inuisa Bonis querela,  
Sicne humi affligis superam beatæ  
Particulam auræ?

Ille vt excedens miseris tenebris  
Pignus æterni repetit PatI  
In nouam demens querulo figuram  
Mutor amore.

Nam me vbi liqui, quibus aut super sum?  
An quid humanæ manet vsq; formæ?  
Annè abijt totum, vt modò nuda substat  
Corporis vmbra?

Induit saxum Niobe, & sepulcrum  
Fit sibi, nec non manet & cadauer.  
O mihi quid sum? gelidum an sepulcrum  
Anne cadauer?

Nec cadauer sum mihi, nec sepulcrum;  
Nam quid hic (si sum) miseris querelis  
Enitor? quid me dolor vsq; & vsq;  
Lancinat atrox?

Consciæ fati miseri ministræ  
Parcite ô Parcæ: melior recessit  
Pars meæ vitæ, nisi nuda substat  
Corporis vmbra.

EPICE-


E P I C E D I V M.

**D**aphnis apud Superos ut desijt esse Superstes,  
Cæpit apud Superos verius esse suos:  
Nec tamen hic des It, qui desijt esse Superstes,  
Ergo is apud Superos vivit vtrinq; suos.  
Pura Polum subijt Mens: virtus dia Superstes  
Vivit & in magnis claret vtrinq; Dijs.

H Y P O R C H E M A.

*Trenodie ad animam Radziuiliam.*

**L**acryma, miseria, vigiles  
Canere celeriter aliquid habile iubent.  
Domicilia supera colens  
Anima, pia, bona, vitrea, nitidula,  
Vbi Charis erat, vbi lepos  
Sineq; scelere pudor, vbi mera pietas,  
Locane Poli igitur habitas  
Sacra, tibiq; noua sacra data recipis?  
Frueis inibi Deo auida  
Bonaq; tua sine lacryma ibi retines  
Vbi metus, vbi dolor abest,  
Supera resonat vbi tripudia phalanx.  
Age noua Policola Dea  
Noua melea tibi cano, tibi numeros  
Dicat animus opere habilis.  
Cape. Paria alibi neq; scio neq; habeo.



*Ad*

ILLVSTRISSIMVM PRINCEPVM  
AC DOMINVM, DOMINVM

CHRISTOPHORVM.

R A D Z I V I L V M, D V-  
CEM BIRZARVM ET DE  
DVBINKIS, &c.

*Dominum suum clementissimum.*



**S** I V E R I S S I-  
mum est, illustrissi-  
me Princeps, vitæ no-  
stræ & ætatis decur-  
sum non euentius  
& certius apparere,  
quàm Sexagesimo  
tertio ætatis anno  
(qui à multiplicatione duorum clima-  
cterorum numerorum, septenario  
nempe, procreatur & nouenario) quem-  
admodum id ipsum non tam ipsius Ari-  
stotelis, Maronis, Ciceronis, aliorum-  
què summorum virorum de Republ.

præclare meritorum obitus, quàm quotidiana experientia rerum magistra, cui contradicere Sophisticum est, comprobat: Attamen inter cæteros annos, quos *ἀπὸ τῆς κλίμακῃ*, id est, à scala siue gradu, & quòd in his, quasi per scalæ gradus vita ætasque hominum progredi ac quasi scandere videatur, non incongruè climactericos nominamus, annum ætatis Quinquagesimum sextum non minus fatalem esse, & ingenio atque arte præstantibus ac illustribus viris vitæ ætatisque terminum decernere, per exempla multiplicia compertum est. Nam quis historiarum ita planè ignarus est, qui nesciat Iulio Cæsari, Henrico IV, Imperatori Ludouico & Matthiæ Regibus Vngariæ, Caroli filio, Friderico I Regi Daniæ, Henrico VIII, Ludeuico XII, Regi Franciæ, Adolpho Duci Holsatiæ, aliisque compluribus summis heroibus hunc climactericum extremum vitæ annum

fuis-

fuisse? Ac quid in præsentia pluribus exemplis opus est? obtulit sese perillustre (tametsi luctuosum) præterito anno, vigesimo die Nouembris in laudatissimo & fortissimo Principe ac Domino Domino CHRISTOPHORO RADZIVILO, Duce Birzarum è Dubinkis. Sacri Romani Imper. Principe &c. Parente generosissimo illustrissimæ celsitudinis tuæ, quem constat non sine præclari nominis omine in hanc lucem editum fuisse, anno Redemptionis nostræ 47. post Millesimum, quingentesimum; Et rursus euocatum ex hac fragili & calamitosa vita prædicto tempore, non sine maxima Reipubl. iactura, luctuque subditorum suorum, imò totius regni Polonici grauissimo. Qui sanè casus magnam quoque attulit tristitiam tum multis alijs per Germaniam nostram hominibus, tum præcipuè huius inclytæ Academiæ Professoribus, vtpote quibus non

incognitæ fuerunt virtutes præclarissimæ  
laudatissimi Principis, τὴ ἐν δὶλογίᾳ, per-  
spectaque affectio planè singularis in  
hanc Academiam, quam maximè decla-  
rauit in eo, quod tuam illustrissimam cel-  
situdinem in hac studiorum gratia ver-  
sari, & per annum integrum (non sine  
laude eximia progressionum egregiarum  
in liberali doctrina, virtutumque lauda-  
tissimarum documentis illustribus) com-  
morari voluit. Atque vt rursus illi de-  
clararent aliquo modo gratam erga bea-  
tissimum PRINCIPEM memoriam, tum  
erga illustrissimam tuam celsitudinem  
obseruantiam suam, publico nomine  
voluerunt extare hoc funebre monu-  
mentum literarium, præmissam (di-  
co) orationem, de vitæ curriculo, re-  
busque gestis præcipuis defuncti princi-  
pis laudatissimæ memoriæ, à viro clarissi-  
mo conscriptam, atque huic adiuncta  
quorundam collegarum nostrorum, vi-

rorum

rorum præcipuorum & doctissimorum  
Epicedia. Quæ omnia typis exarata, iam  
transmitto; Petoque à T. Cl. ea qua de-  
beo animi submissione, vt moram hanc,  
que intercessit, æquo animo ferat, meque  
pro insigni sua humanitate ac clementia,  
quemadmodum antehac ea quoque de-  
inceps sibi commendatum habere pergat.  
Datæ Lipsiæ, XXV. die Martij, quo filius  
DEI, Saluator generis humani, in vtero  
virginis MARIÆ natæ ex Regia stirpe  
DAVIDIS, humanam naturam assum-  
psit ante annos Quatuor supra mill. sex-  
centes.

*Illust. Celsitud. tue*

*deditissimus*

*Christophorus Meurerus, D.*

*Mathemat. Professor, & Reip. Lips.*

*Physicus ordinarius, &c.*



L I P S I Æ,  
Excudebat Michaël Lantzenberger,

*A N N O*

---

clō. lo. ciiiii.



